

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 64 (1979)

Heft: 13

Artikel: Tgi ei cumpetents?

Autor: Camartin, Iso

DOI: <https://doi.org/10.5169/seals-882379>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>

Tgi ei cumpetents?

da Iso Camartin

La historia dils plaids e lur significaziun ei in viadi en tiaras bandunadas e desiartas. Nus duvrein las expressiuns da nies lungatg quotidian cun gronda temerariadad. Quel che fida denton buca sulettamein al plaid dil mument sto serender alla tscherca da significaziuns satradas e tuorna cun surprises. Jeu vi far entgins pass viaden en la historia dil plaid «competenza». Buca mo dertgiras ed advocats, era las uniuns romontschas ein mulestadas da damondas da competenza. Mia intenziun eis ei buca da trer sabias conclusiuns e far parada cun definiziuns stericas: jeu lessel silpli rehabilitar in plaid ed in problem che vegn il bia citaus e capius mo en siu senn stretg ed administrativ. Nos plaids han, sco il filosof Wittgenstein ha manegiau, in tscherchel da glisch tuorbla entuorn els, empau sco la glina. En quei revier denter stgir e clar ston ins serender cu il contact direct tschorventa memia zun!

Ils Latins

El latin duvravan ins il plaid «competere» primarmein el senn da «vegnir ensemble» e «sentupar». Ins plidava da competenza cu duas steilas sesanflavan en ina certa constellaziun, cu ellas securdavan. Quei ei ualti surprendent: nus essan gie disai da capir competenza buca sco ina tendenza d'anflar in l'auter, mobein ual el senn cuntrari: sco il dretg d'astgar separar. Quel che sesenta cumpetents decida e sedeporta senza risguard sin in auter, quasi solitariamein. Sia competenza sebasa sin posiziun ni habilitads specialas. Il senn original latin cuntegn perquei ina biala cunzina: era quel che sesenta il pli cumpetents duess buca emblidar che sia segirtad presuppona enzatgei communabel: ina voluntad da s'entupar e s'unir. Nua che quella maunca dat ei negina competenza da decider e trafficar. Damonda: tenin nus Romontschs buca bugen nusezs per cumpetents sin in camp, nua che la voluntad da s'entupar e sesanflar ei ualti scardalida?

Ils giurists

Nossa capientscha da competenza ei surtut influenzada da sia significaziun el dretg public. Sch'ins plaida leu d'in derschader ni d'in tribunal competent sche manegian ins quel che ha tenor dretg l'autoritad da giudicar. Conflicts e

malsegirtads sur da cumpetenças giuridicas ein regulai el dretg processual. Il cumpetent ei pia quel che ei autorisaus da decider.

Quella significaziun ei denton plitost giuvna. El dretg roman e canonic haveva il plaid aunc tut in auter diever. Ins plidava per exemplu da «beneficiun competentiae» e manegiava cun quei il benefeci minimal che ins stueva schar a mintgin per che el possi viver undreivlamein. Il dretg canonic scheva per exemplu ch'ins dueigi laschar ad in clerical ton sco el drovi «ad honestam sui sustentationem»: per sustener sesez honestiamein. In cert benefeci stueva pia restar en la cumpetenza dil singul per che el seigi buca sfurzaus da gudignar siu da viver en ina moda da dishonur.

Nus lein empunir vid quella significaziun il patratg che cumpetenza sa buca vegnir usurpada totalmein: ei dat in revier, el qual mintgin ha siu benefeci da cumpetenza, pia nua ch'el ei buca suttamess alla voluntad ed al giudicat d'in auter. Ei fa forsa buca donn da reponderar con tgunschamein las uniuns romontschas sesentan cumpetantas el subsummar il consentiment e la cumplaschientscha da tuts Romontschs en lur acziuns. Quei che ei bi e bien per in Romontsch duess esser fundau surtut en siu agen «benefici da cumpetenza» e buca en ina cumpetenza prepotenta administrada d'ina uniun.

Ils biologs

Era en las scienzas naturalas plaidan ins da cumpetenza. Surtut da «cellas cumpetantas». Aschia sa ina cella dalla pial per exemplu sedifferenziar e daventar ina cella d'in égl, sco tier rambots e raunas. Ella ei pia cumpetenta, habla, disponida da semidar e setransformar. Plinavon plaidan ins da cellas «immunologicamein cumpetantas», quei vul dir che ellas han la facultad da sedefender encunter inimitgs entras la producziun d'anticorps. Cumpetenza cellulara ei pia ina habilidad da reagir e rispunder adequatamein enteifer igl ambient, el qual ina cella sesanfla, entras adaptaziun ni entras defensiun. Ils immunologs – perscrutaders dallas battaglias che il tgierp sto gudignar ni sa spiarder encunter infecziuns permanentas da virus – pretendan: ina cella possi esser cumpetenta gia avon che ella seigi vegnida stimulada entras ina attacca jastra. Pia ina cumpetenza zuppada, mo tuttina pinada.

Cheu caztga ei da trer a nez per la damonda generala sur cumpetenza quei e tschei. Seregurdond vid la pial digl égl-rauna ston ins forsa introducir in patratg empau heretic: sco la pial sa daventar égl sil camp biologic sa forsa era quei che ei socialmein nizeivel en ina emprema fasa sco artadi primar semidar e suprender novas funcziuns. Forsa ei igl «esser in Romontsch» per beinen-qualin ina disposiziun primara cumpetenta che sa denton setransformar. El maletg biologic: in «stan amfibic» che quel e tschel ha superau e brattau cun

ina nova fuorma da veta. Jeu sai che ins auda buca bugen quei, mo ei sto tuttina vegnir exprimiu: era egl esser in Romontsch schai la cumpetenza da semidar e buca mo quella da restar sco ins ei. Encunter tutta ideologia ei igl esser in Romontsch era letga e premissa e buca mo sort e truament. En vesta a tontas biografias romontschas che demuossan ual quei svilup fuss ei iertg da surveser quella specia da cumpetenza!

Da l'autra vart – e sco buna consolazion – havein nus il maletg biologic dalla cumpetenza da defensiun. Era quei ei in process fundamental per in saun organissem social. La cumpetenza da defensiun ei integrada misteriusamein en nies esser, mo ella ei era carschida el mument che ella ha stuiu semiserar cun hostilitads exteriuras. En situaziuns da prighel ha il mecanissem da defensiun minoritara funcziunau nuota aschi mal. La damonda che resta ei naturalmein, schebein ei dat era en caussas da lungatg e cultura quella cumpetenza zuppada, mo pinada, che vegn a reagir adequatamein el mument decisiv.

Ils sociologs

Jeu vi sursiglir il diever che ils psicologs ed ils linguists fan dil plaid cumpetenza e terminar cun ina expressiun che il filosof e sociolog Habermas ha derasau e profundiu en la discussiun cuntemporana: la «cumpetenza comunicativa». Ei setracta d'ina teoria cumplicada e differenziada che selai buca explicar cun dus plaids. Cheu vi jeu retener mo in aspect impurtont: Habermas elaborescha ina pragmatica per stabilir e garantir consens denter ils interess, las normas e lur legitimaziun enteifer la societad. Quei tuna ed ei abstract. L'intenziun ei denton eminent pratica: Tgei fuormas da dialog sto ina societad sviluppada realisar per garantir a tut sias gruppaziuns ed a tut ses individuals la pusseivladad da cunvegnentscha? En tgei schai quella cumpetenza comunicativa che duei garantir in dialog, el qual ins sa stabilir quei che ei ver e fauls, bien e schliet? Quei ei seguir buca damondas da pintga impurtonza. Il plascheivel vid quei diever dil plaid cumpetenza ei che el significchescha danovamein in vegnir ensemes, secunvegnir e s'entupar, sco a sias uras tier ils Latins. La historia d'in plaid va denton buca mo en rudi. Ella ha fuorma da spirala e retuorna enrihida tier ina significaziun anteriura.

Per applicar cuortamein quella davosa nomenclatura savess ins sedumandar, tgei premissas che seigien necessarias per ina «cumpetenza communicativa» en caussas romontschas, forsa specificamein per las diversas uniuns romontschas. Mia ferma perschuasiun ei che cumpetenza en fatgs culturals astga buca sebasar mo sin in statut, in tschentament ni ina tradiziun, mobein sto selegitimar en acziun permanenta denter ils members che portan ina uniun.

Leu nua ch'ina grupper ha piars sia relaziun cun la basa ei era la cumpetenza da representaziun stulida. *Nua ch'ei vegn mo administrâu e decretau e buca pli creau e recreau ei cumpetenza mo fuorma senza cuntegn.* Ins sa buca selegitimar inaga per adina. Era legitimaziun ei pensum permanent. Quel che sefida mo sil status quo e survesa co la realitat surpassa quel en sparuns vegn a stuer far egls u baul ni tard.

Mo voluntad da consens vul buca dir che ins dueigi zuppentar e snegar ils conflicts. Competenza communicativa presuppona ual la habilidad da render ils conflicts transparents e cheutras era da surventscher in u l'auter. Competenza communicativa romontscha ei segir era ina dil fatg e dalla enconuschiantscha, mo surtut ina dalla tenuta. Ina tala cumpetenza vegn buca acquistada e garantida cul di da naschientscha en tiara romontscha ni cugl uffeci en l'uniun romontscha. Ella nescha e senutrescha en ina tenuta aviarta ed explorativa, en giavisch spontans ed en ina mira vasta. Il center da tutta cumpetenza communicativa ei la perschuasiun che dus ensemes seigien adina pli cumpetents che mo in. Co di il proverbi talian? In persuls ei mai bien, qnanc el paradis.